



Entschatta dalla procedura da participaziun revisiun totala dalla planisaziun locala

La planisaziun locala dalla vischnaunca Lumnezia consista dad otg differentas planisaziuns d'utilisaziun dallas anteriuras vischnauncas. Quellas ein per consequenza da reglamentaziuns surordinadas, ch'ein idas en vigur el decuors dil temps, per gronda part antiquadas ni buca pli adequatas al temps. La vischnaunca Lumnezia ha perquei elavurau ina revisiun totala dalla planisaziun locala. La finamira ei ina planisaziun locala unificada sur tut ils vischinadis, la quala risguarda il medem mument las atgnadads e l'identitad da mintga vitg ellas anteriuras vischauncas.

La revisiun dallas zonas da prighel ha buca saviu vegnir serrada giu a dretg temps. Las zonas da prighel actualas san perquei vegnir pridas si els plans pér ella secunda runda (ufficiala) dalla procedura da participaziun.

Occurrenzas d'informaziun sco era envesta dils plans e pusseivladad da prender posiziun en scret

Per explicar la revisiun totala dalla planisaziun locala vegn ei a dar la fin schaner 2025 las suandontas occurrenzas d'informaziun:

- ils 27 da schaner 2025, casa da scola Vrin
- ils 28 da schaner 2025, casa da scola Uors
- ils 29 da schaner 2025, casa da scola Lumbrein
- ils 31 da schaner 2025, aula da scola Vella

Las occurrenzas d'informaziun entscheivan mintgamai allas 20:00. Suentar dat ei mintgamai la caschun da prender envesta dils plans ed ils commembers dalla cumissiun da planisaziun stattan a disposiziun per damondas.

Naven dils 27 da schaner 2025 entochen ils 26 da fevrer 2025 vegnan la lescha da baghegiar e tut ils plans da zonas, plans generals da formaziun e plans generals d'avertura ad esser accessibels silla pagina d'internet dalla vischnaunca. Ultra da quei dat ei la pusseivladad da prender envesta dalla lescha da baghegiar e dils plans en fuorma da pupi mintgamai il gliendisgis entochen il venderdis naven dallas 16:00 entochen las 20:00 els suandonts loghens: casa da scola Vrin, casa da scola Uors, aula da scola Lumbrein. A Vella valan ils medems temps, auter che mintgamai la gievgia (per untgir il menaschi da scola) pér naven dallas 17:30 entochen las 20:30.

Duront il temps d'exposiziun san propostas ed objecziuns motivadas tier la revisiun totala dalla planisaziun locala vegnir inoltradas en scret alla suprastonza communal Lumnezia. In formular corrispondent vegn mess a disposiziun.

L'exposiziun da cooperaziun prescretta tenor art. 13 dall'Ordinaziun davart la planisaziun dil territori pil cantun Grischun (OPTGR) succeda pli tard.